

四庫全書

集部

欽定四庫全書

耕學齋詩集卷十

明 袁華 撰

律詩 七言

寄張師允御史兼東高則誠省郎

中臺御史國元儒清廟雍雍列六瑚暫奉旂常司禮樂
又我獬廌費謀謨河歸故道朝東海日麗中天照八區
遙想此時高錄事定陪駘馬步雲衢

送季景福鍊師遊武當

武當之山天與齊子往訪道窮扳躋石乳春流飛肉鼠
日輪夜轉聞天雞身試水崖松下石手援鍊絙雲中梯
歸途儻遇白驪叟為我問訊君母稽

次韻澗天鏡見招奉東雲扉講師兼懷張外史

曾陪外史清涼室二老風流老更狂海上留衣無吏部
僧中愛馬獨支郎近傳蓮社開龍井更約蘭亭汎羽觴
已辦青鞋仍載酒舉杯同吸鑑湖光

小梅軒 舟名

浮家一舸逐鴟夷瀛海微茫渺所思直欲星槎天上去
何如雪艇月中移牕開山木聽谿放簾捲江花看水嬉
獨倚飛軒瞰歸鳥楚雲湘雨念深期

次韻陳敬初陪貢泰甫待制降香宴上

使節煌煌照海濱錦袍光被寵恩新馬班父子昭前史
蘇宋文章繼故人甲帳冷風神欲語斗杓垂野月如輪
禮成歸蹋南州雪猶得延陪笑語頻

久懷簪盍話深期又阻江亭把酒卮詞客暫為遷客去
德星還傍使星移放情自愛閒兼靜違世真非懶與癡
待理闔閭城下棹共談京洛慰遐思

送趙李文湖州知事

昔日參軍今幕府水精宮裏又重來近除牧守皆清選
況復參謀得大材山色滿簾雙燕入溪光照雪一舟回
管公樓下花如霧應擬登臨送酒盃

錢塘秋興

木落江空鴻鴈橫高秋倦客不勝情中原父老憂河決
南徼黔黎望賊平漢武宣房歌瓠子魯連遼海却秦兵
西風獨倚層樓上把酒無言對月明

慈雲巔下拜郊臺遺老曾看鹵簿來自昔祊田供黍稷
于今輦道沒蒿萊金河鴈過沈寒日銀海鳬飛化劫灰
更上高丘表忠觀殘碑剝落重興哀

秋江釣艇圖

我昔繫纜桑落洲好山無數當船頭大孤絕立小孤險

江水遠兼湖水流扁舟老叟釣斜日斷崖古木含清秋
草堂撫卷重感慨滿眼風塵懷舊游

次韻答于彥成

賀監東歸謾自憐思迷芳草綠芊芊閒乘野鶴如騎馬
醉著宮袍不上船晞髮定從天姥頂餐霞應在會稽巔
荔漿百斛山中熟肯向蘓家覓酒錢

次韻顧玉山寄

草堂東郭帶烟蘿門外高軒客屢過鄭國上卿知叔向

新豐逆旅薦常何柳迷官道鶯遷木花暝春江水動波
已許芝雲分半席嘉時行樂醉時歌

送彥栗募農赴都

燕趙開田千里餘募民南國課耕鉏幽風舊詠農官政
大有重看太史書麥秀郊原將乳燕花飛野水欲生魚
耕莘釣渭皆王佐行見承恩侍屬車

答顧周道

司戶謾憐稱畫絕都官翻訝坐詩窮也知困頓塵埃裏

何似栖遲草澤中
江日荒荒連野白
楓林槭槭帶霜紅
春來擬約錢湖上
聯轡看山踏曉風

寄湖南經歷富珠哩子昇

洞庭湖南木葉黃
桓桓憲府肅秋霜
弭節還臨楚王澤
觀風定到屈原鄉
澧蘭沅芷思公子
郢曲巴歌唱女郎
好把音書寄千里
冥鴻今已過衡陽

送友人赴都

闔閭城下送君初
十月征途雪載車
宣室蒼生應有問

新豐逆旅豈無書
天開析木瞻辰極
山合燕然抱帝居
倚馬定看書露布
王門何必曳長裾

北固眺望

大江東下渺滄溟
目盡淮山一髮青
三國英雄終割據
六朝文物已凋零
寄奴故宅今為寺
瘞鶴空墳尚有銘
漁笛數聲天外落
客懷無賴倚闌聽

金山寺

妙高峰下龍游寺
小艇能為半日留
靈物上隨雷電化

大江中抱石崖流濤頭鐘鼓鼉鼉伏鼉背樓臺日月浮
欲汲三冷泉煮茗誰將長綆取深湫

送友人授館崇明

中州人物舊家聲皎皎風姿玉雪明過海綵舟無百里
傳經絳帳有諸生夜瞻北極天如蓋曉望東瀛水似城
椒子花開春又暮好將書札慰離情

寄于彥成

莊北莊南雨乍零繁花如雪照空冥玉壺美酒拈重碧

石室藏文繙殺青
倏忽無煩鑿渾沌
春秋有待問冥靈
松顛騏驥飛行處
定約麻姑訪蔡經

答繆叔正見寄兼東琦元璞

闔閭城裏連朝住
秋雨秋風過客稀
且泛徵君彭澤菊
誰歌義士首陽薇
清霜滿野羣鳥下
遠水兼天一雁飛
憶共孤蓬婁水曲
行觴聯句月中歸

空城落月噪饑鴉
殷地秋風動鼓笳
洗甲天河無壯士
馳車原隰有皇華
人生擾擾投林鳥
歲事忽忽赴壑蛇

只許龍門看泉者笑揮談塵落空花

寄岳季堅詩客計籌山牡丹丘洪碧海

牀頭有酒未為貧汗漫山林一散人已過丹丘期洗髓
還從碧海看揚塵樓開千嶂雲霞曙泉落雙溪草樹春
何日相從問真訣綠陰深處岸烏巾

送湯子誠帥掾

掾郎匹馬南關去木落江空送鴈羣不但鄼侯能給餉
也知韓愈解從軍連營笳鼓花邊合小隊旌旗柳下分

況是大藩財賦地，哦詩橫槩屬夫君。

次韻錢思復五山留題

蘭舟東下汎滄浪，路入仙源草木長。
綵筆題詩情自適，白頭傾蓋意難忘。
坐深河漢星流屋，語久芙蓉露濕裳。
別後相思對明月，吳江楓落有清霜。

丙申正月十七日避地商墓

谿閣春明雨乍停，游絲百尺墮牕櫺。
燕歸故國薜蘿綠，戰退空原燐血青。
未見王師除叛逆，謾將詞賦慰飄零。

難時會合須謀醉笑指丹泉瀉玉鉶

今朝雨晴天氣好黃柳葉深含夕曛高閣下臨平野濶
青山中斷大谿分樹嗟江夏桓司馬詩憶天台鄭廣文
海內風塵猶未息書生亦欲學從軍

次韻王叔正陪李廷璧郭希仲同集玉山草堂

亂離又見臘嘉平訪舊仍同上客行報國終慙結襪子
出關應慕棄繻生濤江水發舩如馬雪浦春回柳似城
懷人索句草堂裏南望孤雲多遠情

草堂夜集

花落銀盤蠟炬紅
杯行小閣夜無風
應須通籍金閨裏
且要埋頭麴蘖中
石室書紬司馬史
草堂吟絕杜陵翁
酒酣莫笑踈狂甚
我欲相從蓋次公

丙申嘉平二十四日鐙下偶成

歲晏蕭蕭風雨生
交年節近月書正
杯盤羅列昏祠竈
鼓角悲淒夜扞城
未獻椒觴陳雅頌
且分豆粥泛膏飴
乞將得酒年逢酉
會見承平息戰爭

陪趙仲光顧仲瑛遊崑山

林壑秋高絕點埃，畫船載酒對山開。
霜明遠浦蒹葭老，木落空江鴻雁來。
魏國王孫多麗藻，華陽真逸有仙才。
翠微閣下經行處，重為題詩拂紫苔。

病中次韻答諸葛用中見寄

連朝寒熱相攻戰，帕首呻吟擁被眠。
頭但岑岑如砭骨，身常兀兀似乘船。
謾憐方朔饑求米，誰似蘓卿凍噉氈。
料得故人同寂寞，客窗恣筆寫詩篇。

避地移舟江水濱
風塵愁殺未歸人
夷亭城下空懷土
甫里湖邊又見春
日落長林烏亂叫
雪晴大澤鴈飛頻
題詩寄遠還相憶
坐對梅花月色新

玉山對雪

玉山中歲未暮
斗柄先回八日春
水邊楊柳開青眼
牕外梅花似玉人
得子須當探虎穴
上書誰解逆龍鱗
草堂對雪栖禪夜
定有驚呼祈孔賓

送張天爵奉賀正旦表航海赴都

相臣奉表天邊去使者乘槎海上行旌旗影拂波濤靜
宮殿春開日月明中原未必無王猛前席須當問賈生
風景不殊民物異江南遺老望休兵

颿檣跋浪駛如鴻縹緲神京在眼中天地未明先見日
九天直上更凌風蓬萊水弱沅清淺龍虎臺高氣鬱蔥
咫尺鳳城春似海五雲端拱帝王宮

眈眈雙闕起中央繚繞紅雲黼黻宸傍慶史已書王正月
鳳函初上帝封章殿頭楊柳黃於鵠海子駕鵝白似霜

拜賜君恩歸佐郡錦衣光彩照高堂

憶得長淮汗漫時樓臺歌吹錦城圍
呂梁水落河魴美
芒碭霜寒野雉肥
道路久無人北上關河空有鴈南飛
可憐風物非疇昔蒿棘如林蔽夕暉

青松白石軒

高人種玉玉山中上有支離之恠松
絕壑雲根蹲虎豹
陰崖雪幹攫蛟龍
青精飯受神仙訣
金粉花浮虎魄醲
為折長枝當麈尾何妨踞石語從容

岳季堅王叔明梧竹堂同集時季堅將歸黃鶴山
長日園池水竹陰臨深展席酒同斟花開落萼五月雪
果熟枇杷萬樹金未覺山王稱曠達更逢顧陸寫蕭森
獨憐黃鶴歸耕者詩酒何時再盍簪

顧國衡海上歸會于可詩齋分韻得從字

出處能全孝與忠寧辭大海駕蒙衝祇將禮義為干櫓
豈但韜鈴閱虎龍烽火頻年成遠別酒尊今夕復相從
金符紫綬居重慶勲業當期上景鍾

夜坐聽雨偶成

哦詩聽雨向西牕，猶勝銜枚夜渡江。
赤壁焚舟驚破魏，馬陵斫木善收龐。
身經喪亂家何在，老去情懷酒易降。
清坐不知更漏永，拋書假寐對殘缸。

寄于彥成

欲采蘋花遺所思，玉山山中秋日遲。
遙天孤鳥沒蒼靄，急雨大魚飛碧池。
握手過谿當此夕，攢眉入社定何時。
獨憐滿地干戈起，對酒毋煩重賦詩。

方塘如鑑淨無波花氣生香雨乍過河漢露涼星斗濕
江湖水落鴈鴻多不辭歸隱在松菊莫遣移文裂芟荷
安得手招笙鶴侶會稽山裏聽笙歌

留題長慶寺呈天鏡淨公

長慶寺普竹園寺西則會稽縣學黃竹園境頗幽寂
余將南歸題以誌別

陰陰雙梓畫當門問訊毘耶丈室尊謫仙時過青蓮宇
異道或來黃竹園山近蓬萊深雨露地隣泮水薦蘋蘩

會稽自昔多奇跡，奈此南歸駕短轅。

芝雲堂小集

池館風微白晝長，芭蕉葉大午陰涼。
蜻蜻點水高低見，燕燕衝花下上忙。
酪粉蕉漿銀盃凍，蓴羹鱸膾玉醪香。
醉騎黃鵠雲中去，豈為睽離慘別腸。

送岳季堅歸黃鶴山

草堂新築臯亭下，雞犬相隨問去程。
牧犢謾傳琴上操，伯倫真得酒中情。
荷鉏曲澗霜初下，晞髮陽阿日始生。

莫向難時嗟不遇龐公猶隱鹿門耕

登綽墩

白雲屏上倚危闌
陡覺梅風四月寒
雲接姑蘓山莽蒼
春生澤國水瀾漫
秔稻再聞輸貢賦
王師誰報渡桑乾
道人築就栖禪窟
好似香山八節灘

次韻酬鮑仲孚出郭偶成

春波門頭春已深
曖曖遠村樹陰陰
故人江海三年別
老鶴雲霄萬里心
暇日何妨隨步履
清時未許擲朝簪

竹橋東畔齋居好尚記持盃對月吟

顧玉山新成釣月磯軒

荷蓀行歌與世違鶴歸城郭是耶非種桃道士玄都觀
汎月仙人采石磯大野龍蛇方起陸青冥鴻鵠自高飛
軒前一架薔薇樹猶放疎花向落暉

寄陸原祥

幽人抱道不出戶水竹蕭然繞舊居清坐自臨修禊帖
感時閒擬絕交書烟銷艾納薰金鴨酒瀉松肪膾鯉魚

日日題詩慰牢落未應與世頗相踈

送梅節判兼寄謝湖州

次韻

白舫青帘海上回賦詩莫訝雨頻催
阮瞻作掾惟三語王粲傷時詠七哀
閭闔風生銷酷暑攬槍星墮淨氛埃
吳淞東接婁江水乘興毋煩數往來

明公持節洞庭丘文采風流禮數優
朱幡阜蓋干城日青雀黃龍大閱秋
漢室興圖恢鄧禹唐家諫疏屬韓休
水西開士時相見爛熳新詩共倡酬

萬姓流離荷厚恩依然桃李滿深村謝安已起居廊廟
梅福何緣隱市門喜見淳龐如魯俗不聞暴虜似羌渾
政成奏對長楊殿賜酒應霑白獸樽

初適嘉興次韻答鮑仲孚先生

於越敗吳於檣李兵交豈意古今同傷心遺老風塵際
舉目河山草莽中白骨似霜秋滿野大星如月晝行空
獨憐鮑叔偏如我對客揮毫目送鴻

七月五日送葛天民歸湖州

傾蓋相逢英妙年，靜依禪客興蕭然。
叩閣未上平戎策，佩犢歸耕負郭田。
水落烏程谿似帶，星明牛女月將弦。
飛樓結傍長松樹，最愛青山墮几前。

武林即事

不到錢塘已五年，故交零落倍潸然。
何人拔劍歌玄武，有客題詩拜杜鵑。
錦繡湖山多虎跡，鴛花巷陌斷人烟。
傷情獨有中天月，依舊清光照冷泉。

切雲雉堞鬱崔嵬，氣壓江山勢壯哉。
萬騎貔貅金作甲，

九關虎豹玉為臺棄繻獨羨終軍志保鄣唯稱尹鐸才
天運循環真有數腐儒白首重興哀

次韻寄謝錢塘

新開別墅對西山燕坐凝香日閉關鷓鴣先鳴農事動
兜鍪不舉羽書閒花前五馬春遊樂月下雙鞬夜邏還
上番梅花曾有約舊題重拂石苔斑

施克讓大監以効忠輸貢南來會于錢塘

秘監風流鬢未絲為詢忠義向南陲黔黎思漢中興日

繡斧還鄉奉使時金匱紬藏書灝灝木天瀑直漏遲遲
好期勲業書麟史行贊謀謨入鳳池

海內紛紛亂若絲乘桴直泝浙江陲中原將帥休兵日
南國稊航入貢時賈誼感時多太息馮唐投老尚栖遲
客牕獨坐無聊賴靜數飛花落研池

還歸鳳閣掌綸絲況爾風烟靜四陲海上乘槎無博望
關中置驛有雷時羽書已報荆襄復饒運休嗟蜀漢遲
聖代秘書皆宰輔扶搖九萬起天池

送唐本初之茅山

唐君本出公房裔寄跡黃冠髻已華欲訪洞經參玉訣
不求句漏覓丹砂弟兄得道惟茅氏父子登仙有許家
老我平生遠遊履塵緣未斷獨興嗟

九老仙都印未刊華陽宮闕聳高寒隱君書著登真訣
長史碑題舊觀壇望拜竹宮流燿火步虛茵閣侯神官
姓名已在龜臺籍鶴背風清聚鵝冠

闕中孚子同年也至正丙午五十一歲中孚上有

慈母下有曾孫一門五世十月廿又四日適逢初
度賦此以慶之

同生延祐丙辰年惟子斑衣舞膝前上壽百齡尊齒德
一門五世見曾玄笥輿春侍花間去竹馬朝迎柳下還
有子有孫皆孝敬山南崔氏世稱賢

野航軒

軒開花柳照波明嘯傲蓬牕悅野情恍載春流天上坐
翻疑晚飯越中行攜家未遂鷗夷隱況宅甘從甫里耕

不問主人當往造樵青還解笑相迎

梅花汎酒

姑射仙人挾麴生醉鄉寄跡類浮萍影沈若水驚橫玉
香散黎雲夢吸鯨止渴屢呼仙掌送和羹錯訝素娥擎
傾盃片片沿流去應誤漁郎放棹行

挽張子英別駕

瀟洒丰姿冰雪如甘泉閒止有齋居囊中秘訣神人授
墓上雄文太史書曳杖軍門曾獻策歸耕田里欲縣車

雙鉤晉帖皆希世洗玉池空月影虛

送人歸京師

秦淮水落大江奔西溯蘭舟海上村柳色曉濃鷓鴣觀
棣花春韡脊令原紫髯上將初分間白髮慈親政倚門
歸向高堂躬定省對床風雨擬重論

送錢虛白鍊師還茅山

青山卵色起中天馬領良常紫翠連雙壁已薶秦相篆
五鍾猶記地皇年黃連乳藝神初下紫木膏成骨易仙

安得同騎大鶴去華陽南便覓真詮

雙鳥凌空去莫扳惟聞飛佩玉珊珊故家遺老俱凋謝
采藥名山自往還鳳尾蓋隨雲影動鹿皮冠映雪痕斑
海桑陵谷雖遷變獨有壺中日月閒

寄錢淮南

風清淮海水無波緩帶輕裘自雅歌玉壘金城嚴虎豹
丹書鍊券誓山河也知韓范懷經濟不數儀秦用揣摩
況是玉堂揮翰手紀功銘向石崖磨

全吳分閫鎮殊方坐擁貔貅十萬強蓄穀廣田推鄧艾
運籌決勝屬張良儲胥蔽日清江浦穰稷連雲白水塘
時憶壯游興感慨相思目送鴈南翔

送閔鍊師省兄還茅山兼柬錢虛白

伯兄兵隔海之隅仲也東尋軼兩鳬閔氏聖門稱孝子
道家句曲號仙都埴甃迭奏宮商合風雨連床語笑俱
此去定逢錢逸士為詢芝朮寄來無

耕學齋詩集卷十

欽定四庫全書

耕學齋詩集卷十一

明 袁華 撰

律詩 七言

題吳景諒草堂疏後

太息神州已陸沉
歸營別墅擲朝簪
閒居自得安仁趣
樂志仍存長統心
架竹依垣開鶴慶
鑿池引水置魚霖
誰云海內無知己
周魯高風重可尋

送洪宰相使還高麗

回望三韓雲海間，趨朝竣事又東還。
乘槎夜渡魚龍國，持節朝辭虎豹關。
帶礪山河稱漢輔，䟽封爵土擬周班。
來承王命勤脩貢，棣棣威儀重可攀。

次韻奉答張雲門應召北上

開遍南枝鄂綠房，虛齋坐對挹清香。
春浮髯頰盃中物，寒澀笙匏腹內簧。
諸子客梁文最盛，兩生在魯學尤長。
軺車趣召趨天祿，賜食從容得屢嘗。

送秦仲方崇明儒學訓導

明詔春頒出紫宸
黨庠遂序法成均
運籌廊廟皆熊虎
奮跡丘園盡鳳麟
七步詞章年更少
一門孝義老彌醇
清朝偃武崇文化
始信儒冠不誤身

海雪軒

海天漠漠雪紛綸
橫槩馮軒欲問津
蓬嶠有山皆削玉
桑田無地不揚塵
絮穿蜃窟樓臺曉
花壓鮫宮觀闕春
待汎仙槎凌汗漫
絕勝放棹剡溪濱

送陸原祥還江陰

十年為客昆丘下把酒臨風語笑同
南越稱臣歸陸賈東吳辟地識梁鴻
異鄉第宅蒿萊外新國河山雨露中
錦服晝還春政好河豚魚上杏花紅

送劉鍊師還龍虎兼簡祝洞天周白士

海上東還獨杖藜柳花飛雪亂鶯啼
琅函寶籙皇人筆玉檢丹經外史題
聖井山開龍起蟄瑤林臺迥鳳來栖
洞天白士今何許猶憶西湖手共攜

次韻答秦仲文

校文東觀繼前賢歸隱蕭齋日草玄
汲冢周書讎蠹簡穀城黃石授韋編
怒撞玉斗鴻門宴淚落金銅漢苑仙
覽古懷今莫惆悵還聽稷下行談天

偶成

不能捫闔與從衡嘯傲丘園養性情
燕雀安知鴻鵠志麒麟終異犬羊生
茅櫚雪霽書聲遠楮帳風微夢寐清
但願太平身健在一犁春雨課兒耕

寄石仲濂市舶

野雉朝飛麥滿田
春明澤國靜風烟
魚蝦蠓蛤三江市
象貝珠犀百粵船
暫把檳榔盤內薦
肯將薏苡橐中還
酒盃遠寄承相憶
遲子歸來對月傳

寄印月潭講師

梓樹峰頭日色冥
杖藜徐步過巖扃
道腴已味中邊蜜
心定能馴大小青
陰合竹牕雲散漫
聲來草閣雨淋泠
也知丘壑因人勝
未必山川自有靈

次韻酬張左司

墓田丙舍郭西頭
霜露淒然又暮秋
千里故園歸夢覺
五更殘月向牕流
夢我詩廢門生誦
風木情牽孝子憂
少展經綸佐戎幕
碧澗堂下放船游

寄興聖琦原璞

每懷宴坐月當庭
石室堂頭老寧馨
家廟至今傳邑子
平湖無復墜天星
猊牀花妥揮談麈
龍鉢珠明護賜經
不叩禪關已三載
新松應長過檐青

素華軒

素封家開素華室乃在練祁之水旁千樹梅花渾是雪
一庭月色只疑霜神遊空洞生虛白潛心內景修中黃
未饒剡曲多清思乘興須當汎野航

過南翔寺簡勝仲殊

齊公昔建阿蘭若唐刻今存宰堵坡井邑人非雙鶴去
江鄉日落一舟過夜壇暖足無玄兔曉室聽經有白鵝
問訊東林蜜殊老中邊之味近如何

寄金西白次韻秦文仲

金爵觚稜臺殿重陰陰寶樹瑞烟濃龍章上揭文奎麗
象教東傳大國宗特進禪林開士首絕勝侯爵太中封
遙思對榻南莊夜杖錫何時得再從

送僕公文出使高麗還京師

煌煌龍節海東還不易冠裳立筍班惟用一言通絕域
何須三箭定天山陪臣奉表梯航至異姓封王誥印頒
陸賈當年成底事實刀游騎未吾慳

西雨軒

拄笏朝看爽氣生捲簾晚見濕雲橫
漏天未補媧皇石
啜酒俄傾蜀客觥
闔闔風來先拂輿
桑榆日薄又開晴
載歌暮捲西山雨
始信王郎負盛名

送盧公武應召北上

前朝圖史已全收
詔起丘園重纂修
治定功成遵禮樂
大書特筆法春秋
金壺墨瀉朝揮洒
銀燭花銷夜校讐
進卷內廷承顧問
鵠袍端立殿西頭

書聲齋為錢生賦

幽人讀書茅屋底
況是前朝忠孝家
宛若商歌出金石
又如長嘯隔烟霞
風傳清漏音相答
雪洒虛牕韻更嘉
洛下諸生應效詠
却憐司馬聽琵琶

直沽即事

驚輿北狩神京日
車騎回屯海浦秋
草地霜寒散駝馬
旃廬日夕下羊牛
革囊桐酒醺人醉
蘆葉吹笳動客愁
可見太平忘武備
蹋歌頓足擁貂裘

沙門宛在海東邊
白浪漫空霧漲天
屯衛遠分貔虎隊
島夷潛匿蜚蠻船
蓬萊清淺高秋見
碣石蒼茫落照連
應笑嬴秦那解事
虛勞徐市訪神仙

送盧拙閣遊茅山

盧郎抱琴別我去
駕言往采茅山薇
三峯月下木客嘯
丹陽湖中姑惡飛
筍輿問程谿店遠
芒屨躡雲林徑微
歸來袖有長生藥
乞取刀圭意莫違

無題

玉樹參差障羽幢舊愁如水漫春江
歲華鎖合收銀鑰
窈窕樓空閉綺窗
鴈橫釵終作對舞鸞
窺鏡強成雙
繡屏倦倚看紅豆
滿眼相思意未降

環珮珊珊下漢皋
瑤樓風度鬱輪袍
琴心寄興傳孤鳳
華意留情屬小桃
金粟柱移箏上雁
玉蓮盃舉掌中醪
乘鸞一去無消息
腸斷神仙夢寐勞

燕語銅樓淑景移
鏡臺香冷玉盤螭
書傳王母三青鳥
針度天孫五綵絲
江浦見蓮難覓藕
石枰尋子未圍棋

獨憐鸚鵡知人意飛傍琵琶索荔枝

裙曳湘羅漾麴塵雀釵小佩玉麒麟紫簫偷按雲中曲
彩筆慵傳鏡裏真蝶粉膩花金作縷鴈沙回雪翠為茵
若蘭錦字多華麗不減風流賦洛神

題張外史登善精舍

陰森水石林堂幽六月彷彿如三秋高遁何慚孔車騎
舊遊還憶董糟丘鶴臺夜禮紫虛象鳬舄朝回黃篋樓
願乞引年餐玉法頡頏飛佩閬風頭

送唐希顏入京師

挂席清江勝駕車，柳黃梅白雨晴初。
不師鬼谷從衡術，獨善庖羲卜筮書。
繞郭烟花春日麗，對床風雨夜窗虛。
便郵頻把音書寄，莫待慈親暮倚閭。

瑞上人遠碧亭

亭子新開片玉東，馮虛舉目送飛鴻。
水窮鼇背三山小，雲澹蛾眉兩黛濃。
詩詠墨華懷貫老，記存奇字憶揚雄。
知君覽勝多佳趣，盡在秋風落照中。

寄天衣淨天鏡長老

會稽名郡素多賢翼舉高風更凜然金縷賜衣梁代日
紫檀遺象義熙年千峯秀色層檐外雙澗清流絕磴邊遙
想升堂談法罷匡牀鐙火理殘編

竹園寺裏昔曾遊彈指流光十六秋諸刹每傳新學起
一簾猶為故山留文詞雅正推褒柳詩句清妍屬漱休
湖海老成凋謝盡杖藜何日浙江頭

用韻奉答徵幘原

憶得相逢春未深別來紅雨徧園林江湖契濶勞清夢
田野栖遲愜素心萬壑千巖應眺覽五時八教重披尋
天親無着難兄弟剪燭何時對榻吟

江山如畫軒

楊子為郎鬢未皤旋開小室枕巖阿江如赤壁英雄少
山似新亭感慨多林末濤波來一綫雲邊龕赭澹雙蛾
衰年不減登臨興擬待清秋著屐過

林泉民為張某賦

鹿豕同游說野情一廬願受作編氓窮幽擬草愚谿記
養拙甘從甫里耕春澗巖拳和露采秋林木耳帶霜烹
淮南有客歌招隱莫遣兒童識姓名

癸丑正月風雨中偶成

入春彌月雨霏微驚蟄無雷雪又飛撫節不愁花藥晚
感時惟恐麥苗稀當歌對酒愁難遣問舍求田志已違
只尺相望不相見空吟偈側思依依

歲除風雨決新正二月將終未放晴殘雪不消猶待泮

輕雷欲震又收聲
樵蘓後爨愁童穉
故舊凋零失老成
推枕無眠清夜永
淋淋簷溜百憂生

西爽軒

層軒新築澗之濱
日射丹書草木薰
天末火流秋沆碣
岡頭玉潤曉絢緼
清寒恍對晴山雪
散漫如瞻華岳雲
不似滕王高閣上
珠簾捲雨又斜曛

寄倪雲林先生

人日纔過春未深
滿城風雨晝陰陰
又逢元夜傳柑燕

恰似重陽汎菊吟字寫硬黃當几畔硯分淺碧到溪潄
從宅狂客時推罵笑對青山酒自斟

過廣陵

十年不到廣陵城依舊璫芳弄晚晴繡被土甃于闐寺
寶裊刀劒鎮南營樓飄簫鼓雲中起地接烟花日外明
小杜風流今寂寞誰攜紅袖按新聲

叅軍吹作鳳凰鳴廿四橋頭壁月明欲把璫芳祠后土
還持彩筆賦蕪城小樓窈窕低金縷別館蒲萄下玉嬰

醉寫烏絲遺所愛風流髣髴記三生

郭晞仲新莊

抱郭春流帶草堂四檐桐梓曉蒼蒼
百花潭上詩人宅五渡谿頭處士莊
且喜比隣連伯姊不愁行酒少兒郎
西郊從此頻相過剪燭論詩夜未央

珠金沙

將軍為國仗安危勢弱兵孤謾出師
江左望風如破竹沙邊背水尚張旗
可憐吳楚三軍潰始信襄樊一木支

揚子秋高波渺渺木綿春盡草離離

登桐川郡樓

桐川郡樓一登覽好風東來吹酒醒數里已分吳楚地
百年如寄短長亭鳳凰遠舉梧桐老燕雀生成桑柘青
虛名得失何足論更盡沙頭雙玉鉗

酒酣倚闌西日暮青山當戶如高人銀杏樹陰不受暑
薔薇花開猶是春日送雲霄瞻羽翮手捫河漢近星辰
莫欺老子才情減還據胡牀岸角巾

寄子明兄

我兄三月適上國賤子定省臨高堂慈親病已勿湯藥
弱女手解縫衣裳五雲樓觀烟花麗萬里河山日月光
司馬多才年更少擬將詞賦獻長楊

次韻奉答盧伯融見寄

東老書多未是貧瘦生誰念苦吟身雲橫馬首山如戟
月過階前鵲似人蘓武流離終仕漢揚雄寂寞却歸新
冥鴻肅肅清霜重獨倚高秋落木津

送雷太守赴武寧

前席親承大府開，武寧政迓使君來。
也知劉項爭雄地，須得龔黃治郡才。
芒屨嵌空當野斷，黃河如帶抱城回。
理間引客登高賦，應在重瞳戲馬臺。

寄休寧宰唐子華

盡說休寧邑宰賢，清詩多與畫俱傳。
彈琴垂簾白日靜，種花滿郭青山連。
葉縣歸來候鳧舄，漚波浩蕩放漁船。
公餘鎮日渾無事，好寫新詩寄一篇。

次韻鄭明德喜雪

水曹東閣靜無塵，坐閱飛雲若似人。
簡授兔園曾作賦，律吹燕谷欲回春。
細枝梅放花無賴，白戰詩成筆有神。
遙憶龍沙三萬里，望中馳道爛如銀。

朔風吹雪徧原野，誰卧衡茅若凍蠅。
玉署寒生催賜酒，金槃光動憶分冰。
絮穿閣道粘珠箔，花重旃房壓綵繩。
田野何由稱賀表，五雲高御六龍升。

次韻秦文仲暮春見寄

三月江南暖尚微
雨餘草色故菲菲
野棠自發真娘墓
烽火猶連道士磯
謾說尚方封事少
未聞南國羽書稀
何人得似秦文學
小閣褰簾看燕飛

江南春盡子規啼
愁裏看花思轉迷
乳燕定巢當戶語
斷虹截雨傍江低
斬鯨政欲提三尺
簪筆何由侍兩闥
滿眼干戈連海岱
置身安得月中梯

寄于彥成岳季堅

雪霽平蕪帶曲村
思君白髮照清尊
嬌鶯恰恰花連屋

穉柳青青水到門江閣遙山來遠碧草堂新月見纖痕
風流二子居丘壑賦就停雲一斷魂

夜宿東閣夢中燕遊甚適覺而梅影上牕橫斜可
愛口占一詩以紀

梅花千樹草堂南花氣浮空若霧嵐姑射山中春自好
羅浮天上夢初酣蟠桃謾說瑤池晏仙桂徒誇月窟探
萬里仙遊才一瞬不知雙鬢雪髣髴

綵燕

剪開雙尾出烏衣，便逐釵梁小鳳歸。
曉倩嬋娟紅縷繫，春迎倭墮翠蛾飛。
香銷金屋花無語，影落粧樓月有暉。
慚愧年年一相見，秋娘老去鬢雲稀。

寄虞子賢

虞仲園池芝水漬，華林曲館遠人羣。
一編豈為窮愁著，萬石猶能孝謹聞。
玉躡金題書滿架，錦衣珠履客如雲。
悠然坐挹西山翠，寶鴨焚香到夕熏。

清明日偶成

舍南舍北柳如城故著離黃燕子鳴
莫向鏡中嗟種種
且於槽下聽長長清童解誦高軒過
好客應須倒屣迎
坐對梨花浮大白人生看得幾清明

丁未紀事

二月春城桃杏妍黃花離落景蕭然
表忠曾護錢鏐墓
至德惟稱太伯賢千古英雄徒有錄
一時讒佞已無權
早知鞭背東城路悔不歸耕負郭田

列壘連營日戰攻脫身虎落自從容
但知蜀國專王建

尚記虬髯擬太宗冠服未遵唐制度河山已入漢提封
一時佞倖空遺臭拜賜黃金口齧癰

入叅帷幄運奇謀翼贊功成禮數優華蓋醉樵周尚父
軍營借箸漢留侯有身暴露家千里無骨歸埋土一坏
多少門生并故吏不知還有孔車不

登臺入省總權綱坐擁全軍勢力强樵李未聞丞相死
會稽先報大夫亡提孩感動猶垂淚行路興憐亦斷腸
借問誰能為此計斯人今已葬江鄉

熏天富貴復何求，又欲飛行駕鶴遊。
董卓臍燃郿塢日，嵇康兵解洛陽秋。
誰人浙黨攻閩黨，此輩清流投濁流。
栖老園中荆棘遍，園棋墅裏麋麋游。

敵國兵連地數侵，壽藏高築徧山林。
嫖姚破虜辭營第，太傅還鄉散賜金。
隴卧牛羊春短草，穴穿狐兔夜堂深。
清明麥飯無人灑，日落風顛叫恠禽。

馬公著見山樓

徙倚霜林萬木秋，好山都在馬家樓。
大江西上經秦望，

巨壑東傾見沃洲
半夜書聲天外落
四檐雲氣座間浮
登高作賦休懷土
擬汎星槎問斗牛

送嘉興經歷茅某之松江府判

柳塘水漫曉揚舲
離思亂逐花冥冥
芙蓉舊種叅軍幕
芍藥新開判府廳
三江龍蟠走海白
九山鳳舞入雲青
理閒覓句坐長日
芳草芊眠春滿庭

巢雲軒

三素雲中結一椽
致身蕭爽思悠然
自怡遠效陶貞白

覽秀重懷李謫仙
氣合虎龍交
鼎內影隨鶯鵲宿
檐前肯輸艮岳為
朝貢擬化商霖潤
旱田

寄盧伯融

乘桴東下避風烟
矯首淮雲思惘然
漲海塗泥皆樹藝
授經子弟總才賢
青鳩紫蛤嘗登饌
金橘紅椒不論錢
白髮滿頭俱老大
冶遊花底憶當年

浮家南北久離羣
知爾移居向海濱
白首一經能教子
黃茅千頃比封君
異鄉花鳥皆春思
故國關山半夕曛

何日酒船還舊里青山對榻坐觀雲

寄梅林普慶二長老恢復初首座彝天倫藏主

諸子才華老更成自慚蒲柳易凋零
梅林兵後山如赭普度春還樹似屏
塵拂寶花分半席几翻貝葉校羣經
彝公閱盡毗盧藏立雪堂中有寧馨

庚子十一月望日大星殞于西南

歲十一月大星殞斗柄插子夜初更
燄光燭地散霞綵芒角經天如月明
春秋重犯災異見田里厭聞愁歎聲

臨風勸汝一杯酒海宇何日歌昇平

客甫里白蓮寺答顧玉山見寄

風流王湛豈真癡世路崎嶇蜀道危獨酌花前明月我
百年駒隙主翁誰南州名節稱高士亂世功名屬健兒
海內承平欣有象憂天莫作杞人悲

滄浪一曲繞茅堂投老歸來賀監狂鸞鳳豈因梧竹止
鴈鴻亦為稻粱忙榮名身後嗟何用濁酒生前醉不妨
雪裏梅花迥高潔結交歲暮莫相忘

江村十日雪不消茅屋難禁風怒號高隱何殊醉侯放
浪遊端似水仙陶大星中天光煜煜孤鴻斷野聲嗷嗷
老夫畏寒閉戶卧那辭百罰醉醺醺

寄蔣都事

憶得吳門話別時亂離十載信音稀
盈顛白髮今吾老滿眼青山往事非
天上郎官應有象江南倦客尚無衣
遙知李監歡迎處繡服當春又晝歸

水月清華亭

畫錦堂中結小亭方池如鑑照檐楹山河影落鮫宮迥
蘋藻光涵兔魄明神女凌波遺玉佩素娥飛轡下瑤笙
一塵隔斷人間世獨倚高明爽氣清

賦得禹廟送人之越

代作

大禹神功別九州巍巍古廟越山頭玄珪告錫昭成績
洪水懷襄息橫流雨濕梅梁靈物化香凝龍袞瑞烟浮
送君再拜瞻遺象夢叶熊羆在運籌

雪山圖

雲氣浮空高復低
石林茅屋望中迷
山回鳥道青天上
水落魚梁碧澗西
欲訪松喬窮絕頂
直捫蘿葛躡飛梯
歸來城郭還依舊
坐對新圖賦紫谿

唐本初西郊草堂

草堂小築西郊外
杜風流尚未隳
豈但山靈回俗駕
還因錄事寄新詩
柳塘飛燕穿書幌
花墅啼鶯近酒卮
從此門前多轍跡
老翁莫厭客頻來

次韻劉伯叙送錢教授奉表入京

廣文拂曉發東瀛
函表乘輶赴帝京
雙闕遠瞻龍虎氣
層臺重聽鳳凰聲
花迎綵仗春風軟
柳映宮袍曉露清
況是江南佳麗地
金尊莫惜倒烏程

重韻寄劉伯叙

恩榮曾錫燕蓬瀛
五馬西來自玉京
江左衣冠傳舊族
海濱謠頌動新聲
蒲輪結駟登金馬
荏石聽鶯覲紫清
此日牛刀聊小試
還居台輔定章程

耕學齋詩集卷十一

欽定四庫全書

耕學齋詩集卷十二

明 袁華 撰

絕句

題野航壁

綠水滑可染白石明可把高林落秋聲誰舩繫其下
顧玉山園池十有六詠

碧梧翠竹堂

桐花落銀床竹色被蘭渚六合飛炎埃高堂不知暑

玉山佳處

玉山最佳處牕戶絕纖埃門無俗士駕禽鳥不驚猜

釣月軒

閒耕山中雲坐釣谿上月仰看白玉釣下垂紫貝闕

湖光山色樓

嵐起天邊雨帆飛樹杪風湖光與山色倒影盡樓中

芝雲堂

堂陰有奇石如芝復如雲望雲懷友生采芝招隱君

漁莊

公子不好獵小莊濠上居長舫載大炬清夜看叉魚

種玉亭

采得崑岡玉連雲種小亭月華潤靈雨虹彩燭蒼冥

百花潭

朝乘百花舫暮醉百花潭纖纖潭上月流影照清酣

小蓬萊

露下仙人掌雲生玉女牕弱流三萬里飛度寶魔幢

可詩齋

東閣觀梅放西池夢草芳絕勝驢背上風雪灞橋傍

浣花谿

花迷巷南北水接壤東西行春向何許只在浣花谿

柳塘春

燕尾鯉飛水鷺黃柳覆隄水流花似雪疑是武陵谿

小遊仙

麟脯麻姑擗桃花
緌母栽天家青鳥
使飛去復飛來
讀書舍

芳草生書帶香
芸辟蠹魚鈎簾
雙燕入長日坐
看書
鳴玉洞

此君有清節
高居在空谷
吹簫躡鳳翎
珊珊鳴佩玉
金粟影

金粟花千樹
銀河月一輪
舉杯邀對飲
天上謫仙人
采上人南澗圖

箕踞長松下谿流如白雲美芹采南澗可以奉吾君

谿山高士便面

楊柳拂谿流風牽荇帶柔前山青可數停楫坐船頭

題李嵩會茶圖

穀雨初晴花亂吹金河春水膩如脂挈餅小試團龍餅
想見東都全盛時

春日偶成次韻

竹樓曉日明疎檻松徑清飈度曲榭遠水微茫雲外白

邊山縹緲雨中青

南高峰下前朝寺寺有高僧兩耳長當記清秋涼冷後
桂花深處坐焚香

坐深魚鳥自相親野老忘機欲卜鄰柳外飛橋新雨過
桃花水漲半篙春

次韻顧仲瑛書杜氏便面

乳燕初飛藕作花秋娘二八髻雙了臂韞微露真珠絡
疑是錢塘舊內家

楊饒崖顧仲瑛葛元哲約祭張貞居或者以它事
所牽弗果元哲有詩謹次韻以速成之

湖陰窈窕畫船開誰酌荒山墓上苔明日歸舟載春雨
風篴靈石幾時來

香滿芸牕晝未開白鵝湖上卧蒼苔山風宿草吹新雨
尚有高人載酒來

西湖春日禱興

柳淡鶯黃雨弄晴斷岡泥滑竹雞鳴便須移席長松下

坐聽風泉落澗聲

北瞻靈鷲山園寺東望初陽樹繞臺昨夜龍泓新過雨
亂流花片入城來

西郊草堂對酒口占

一點飛花落酒盃大江如帶草堂開尊前恠底天香滿
人在瑤臺月下來

吳江道中

澹雲收雨動微風山色湖光慘澹中雙漿夷猶坐天上

不知身在水晶宮

上巳日晚步商墓西村

桑葉青時戴勝飛
紅紅白白映粧扉
棗花欲落綠車響
連臂行歌緩緩歸

商溪溪上日初晴
豔粧綵服踏春明
桑樹葉圓蠶出大
布穀夜啼郎起耕

葉暗柔桑花亂飛
新蠶如螳燕初歸
紡得麻紗連夜織
為郎製作下田衣

客吳興春日偶成

曾聽吳門唱大隄只今惟有野烏啼
故人魚雁馮誰寄江水無情日又西

龍鳳山青露兩尖谿頭把酒月纖纖
從教柳絮霑書帙滿地春風不捲簾

檀林日暖蕨芽生桑隴風微布穀鳴
客子思家政愁絕長松吹雨落谿聲

雙眉刷翠小紅娘斗酒梨花為洗粧
一曲纏頭不知數

揚州城內善和坊

深鎖春風罨畫樓
杏花香裏醉扶頭
何人得似任公子
相府蓮歌不解愁

杉峯雙鸞壽意便面

集句

橫玉叫雲清似水
松杉峰外亂山青
近得麻姑書信否
夢中同躡鳳凰翎

天基莊菊花

仙子乘風過赤城
金槃玉露掌中擎
月明解佩江頭去

五色雲霞擁絳旌

寓綽塹壽寧菴

栖禪窟畔好高樹三靜境中皆白雲已繙瞿曇内外典
更禮茅家大小君

北山何處境清絕藤軒陰陰生晝寒明月飛來散清影
金沙布地為君看

柳塘春軒口占

橫雨狂風三月餘柳塘水漲起潛魚花明蘭渚坐垂釣

葉暗芸窗好讀書

快雨時晴暖尚微
小亭簾幙護春暉
麴塵波動鳬雛出
金縷條長燕子歸

送寧伯讓還南臺分韻得來字

落日楓江水似苔
画船撾鼓大颿開
栢臺一夜清霜重
併逐秋風白雁來

顧玉山客嘉興春暉樓前木芍藥盛開因誦張平
昌所和令狐祖公別牡丹詩曰平章宅裏一闌花

臨到開時不在家
莫道兩京成遠別
春明門外即天涯
因次韻別賦五首同寄

真態生香解語花
臉酣春酒醉兒家
陳王謾倚能詞賦
翩若驚鴻洛水涯

萬卉千葩孰與京
故人相見眼偏明
金盤玉露傾朝日
似對春風訴不平

爛熳春暉玉一闌
香籠繡幄醉中看
于今寂寞西園裏
無奈羅裳怯暮寒

三九清齋修洞房小樓午夜禮虛皇
殷勤金盃收花露
留待研朱校玉章

穀雨初晴三月時燕飛簾幙晝遲遲
主人不見花開落
欲倩徐熙寫折枝

恠雨顛風春事非蜻蜓蝴蝶作團飛
端端老去才情減
不奈輕寒薄縞衣

水仙圖

集句

疑似瑤臺月下逢
強擡青鏡欲粧慵
風吹仙杖飄飄舉

五色雲車駕六龍

宣和翠織成雪沙雙鴈圖

鴈沙飛雪爛于銀共詫宣和製作新何似帛書歸上苑
暮年冠劍畫麒麟

題鄭所南畫

弓劍空遺瘴海涯南冠悵望淚偷垂滿頭白髮心如鐵
自寫幽芳慰所思

鄭君獨行今重見圖畫仍兼著述存多少梁園舊詞客

長裾又曳向誰門

吳緣鸞像

身跨於菟手執書鍾陵山峻路崎嶇當時只合華陽去
日寫黃庭禮紫虛

黃葵蛺蝶圖

金莖傾日露華晞漢苑秋高燕已歸賴有多情雙蛺蝶
翩翩時近鵲袍飛

馬遠所畫握扇楊后題識于上

金粟花攢壁樹開月明露濕玉階苔尚餘數疊香痕在
曾向坤寧殿裏來

列子御風像

四十餘年鄭圃居人不識獨耽書九天寥廓冷然去
安用回風畢道車

吳仲圭墨竹

風生太液水微波霜影侵階月色多截得昭華蒼玉琯
多情簫史奈愁何

直沽偶成

草低沙軟見牛羊
烟霧蒼茫落日黃
燕女如花不相識
笑傾馬湏勸人嘗

海霧昏昏水拍天
馬牛遺矢滿平川
翻思五月江南道
萬木清陰叫杜鵑

狸奴窺蝶圖

黑睛如綫午風清
賈勇潛身勢不驚
莫向花陰窺蝶蝶
街頭鼠輩政從衡

過清江浦

八里莊頭淮水長
清江浦邊楊柳黃
楚女窄鞵小錦袖
醉歌竹枝行玉觴

過能拙翁蘭若

鹽鐵塘邊草色齊
我居塘東子塘西
興來相過不相問
自把新詩竹上題

二月廿九日遊董氏墳菴次錢成夫韻

明朝二月三十日
三分已過二分春
莫思萬事且飲酒

林外提壺亦勸人

草堂清集

芙蓉小苑落秋紅
聲動帷屏瑟瑟風
共說揚州月無賴
紫鸞簫裏露臺空

繡被熏籠護暖雲
酒痕曾上繚綾紋
秋風草閣梧桐雨
清坐張鐙校玉文

秋風細細動青蘋
甘菊決明開漸新
禾黍登場雞犬靜
買魚沽酒醉比鄰

清弓軒棹歌

東汭瀛海望蓬山西上昆丘遡九灣
四櫓撇波橫鴈翅恍如鶴背載笙還

三十六陂春水生一百五日又清明
輕帆低拂桃花雨醉踏船舷歌濯纓

水落天門放順流何須百丈打磯頭
郎歸不化身為石重掃蛾眉兩點秋

趙魏公黃葵

天上王孫白玉堂曾瞻黼展御袍黃寸心傾日應多渴
露瀉金莖賜一觴

仙山樓觀圖

萬山起伏如波浪中有瑤樓掩靄間憶駕松顛騏驎去
亂雲堆裏聽潺湲

柳塘雙鷺

楊柳眠谿春水生春鉏並立眼偏明莫思灘瀨魚蝦美
忘却雲霄萬里程

顧定之墨竹

八法從衡篆籀文墨池春水蕩湘雲任它門外風埃滿
日報平安有此君

題仕女

微步瑤階不動塵妖嬈豈慕東鄰手援仙桂沉吟處
誰是龍頭第一人

不使鉛華污玉肌內家粧束入時宜欲隨女伴尋芳去
只恐西園蛺蝶知

枇杷白頭

枝上花開才歲暮
葉間子熟又春殘
何緣山鳥頭先白
錯訝韓家金彈丸

黃葵圖

玉階桐葉委清霜
青鳥西飛漢苑荒
猶有金盤仙掌上
獨承湛露向朝陽

梨花乳雞圖


乳雛出殼老雌鳴
石上雄呼喔喔聲
同入春園拾蟲螳

梨花雪白近清明

送王鍊師遊龍虎兼東周白士祝洞天

古洞曾窺一綫天歸來塵世又千年
笑騎遼鶴聞山去
荔子花開海月圓

磷磷白石龍泓下泉落清池月半彎
憶與仙都周白士
鉤簾把卷對南山



耕學齋詩集卷十二